

ԸՆԴԴԻՄԱԽՈՍՈՒԹՅՈՒՆ

Աննա Երկանյանի „Գևորգ Դերիկյանի ստեղծագործությունը,,
թեկնածուական ատենախոսության վերաբերյալ

Աննա Երկանյանի ատենախոսությունը, ինչպես նշված է սեղմագրում, „նվիրված է 20-րդ դարի երկրորդ կեսի գրող-հրապարակախոս Գևորգ Դերիկյանի ստեղծագործությունների ընդհանուր վերլուծությանը,, /սեղմ., էջ 3/: Ընդ որում, թեմայի ընտրությունը կարևորվում է նրանով, որ Գ. Դերիկյանի „գրական ժառանգության և հասարակական գործունեության մասին թեև տասնյակ հոդվածներ են գրվել, որոնք ցրված են ժամանակի մամուլում, ինչպես նաև գրաքննադատների հոդվածների ժողովածուներում, սակայն նրա ստեղծագործություններն ամբողջականորեն քննող գիտատեսական աշխատանք դեռևս չկա,,: Ըստ այդմ, ատենախոսի հավաստմամբ, սույն ուսումնասիրությունը „լրացնելու է հայ գրականագիտության մեջ Գևորգ Դերիկյանի ստեղծագործության քննական-ամբողջական վերլուծության բացը,, , ինչը և պայմանավորում է նրա գիտական նորույթը /սեղմ., էջ 4/:

Հետևապես, ելնելով գրողի „գրական ժառանգության ամբողջական քննության,, նպատակադրումից, ատենախոսն առանձին զլուխներում հիմնավոր հետազոտության է ենթարկում նրա գլխավոր երկերը՝ „Տրդատ ճարտարապետ,, /1983/, „Գոյամարտ,, /1986/ պատմավեպերը, այսպես կոչված „հայոց պատմության անցումային շրջանին նվիրված ստեղծագործությունները՝ „Վիրավոր կոունկ,, /1977/ վեպն ու „Որբացած հուշարձան,, /1975/ „պատմագեղարվեստական արժեք,, ունեցող աշխատությունը, ինչպես նաև պատմական ու արդիական խնդիրներ արծարծող պատմվածքները, կամ „փոքր արձակը,,:

Կարծում ենք, ճիշտ է վարվել աշխատության հեղինակը՝ ատենախոսության գլխաբաժանման հիմքում դնելով „Գ. Դերիկյանի ստեղծագործությունները ժանրային թեմատիկ բաժանմամբ ներկայացնելու սկզբունքը,, /սեղմ., էջ 5/, ինչը թեև խախտում է նշված երկերի լույս ընծայման ժամանակագրական հաջորդականությունը, սակայն հնարավորություն է տալիս խուսափելու անհարկի կրկնություններից, ինչպես նաև առաջին պլան մղելու գրողի առավել նշանակալից երկերի քննությունը:

„Սերածության,, մեջ ատենախոսն իրավացիորեն նախ և առաջ անդրադառնում է պատմական թեմատիկային դիմելու ժամանակի ընձեռած հնարավորություններին: Ըստ նրա, անցյալ դարի 60-80-ական թվականներին „նոր մոտեցում է ձևավորվում պատմության հանդեպ,, , որը պայմանավորված էր „անհատի պաշտամունքի հաղթահարմամբ,,: „1960-ականների գրական սերունդը նոր նվաճումներ է արձանագրում անցյալի գեղարվեստական ընկալման և մեկնաբանման, ազգային-պատմական արժեքների վերագնահատման և վերաիմաստավորման գործընթացում՝ կարևորելով անցյալի փորձն ու դասերն արդիականությանը ծառայեցնելը,, /Էջ 3/: Հանդես գալով նշված շրջանում՝ իր մի շարք գրչակիցների հետ, Գևորգ Դերիկյանը ևս շարունակում է հայ պատմագրության ավանդույթները, „նորովի հարստացնելով խորհրդահայ պատմավեպը,, /Էջ 20/:

Ո՞րն էր այն նորը կամ „նորովին,, , որ նշում է ատենախոսը:

Նախ՝ ժանրային առանձնահատկությունը: Ընդգծվում է, որ, օրինակ, „Տրդատ Ճարտարապետ,, պատմավեպը կարելի է համարել նաև պատմագեղարվեստական տարեգրություն, որում գործողությունները զարգանում են ըստ ժամանակային ընթացքի,, /Էջ 25/: „Վիրավոր կռունկ,, վեպը կառուցվել է „դեպքերն իրար հաջորդելու սկզբունքով,,՝ 30 դրվագ-գլուխներով, „Գոյամարտ,, վեպում „հեղինակը հավաստարիմ է մնում պատմությանը՝ դեպքերի ընթացքը ներկայացնելով ժամանակագրական կարգով: Այդ իսկ պատճառով այն կարող ենք համարել վեպ-ժամանակագրություն...,, /Էջ 54/: Միաժամանակ, նշվում է, որ պատմական հավաստիության հասնելու իր ձգտման մեջ գրողն ուսումնասիրել է ոչ միայն ժամանակի պատմիչների /Ասողիկ, Լաստիվերցի, Ուոհայեցի/ երկերը, այլև „պատմագիտական հարուստ գրականություն,,: Ի վերջո, եզրակացվում է, որ „Տրդատ Ճարտարապետ,, պատմավեպը նաև պատմակենսագրական վեպի է նմանվում, իսկ „Գոյամարտը,,՝ վեպ-ժամանակագրության,, /Էջ 54/: Եվ ապա՝ վեպի գլխավոր հերոսի՝ պանդուխտ Արթինի „ճանապարհորդությունը ուղեգրական ու նաև գիտաճանաչողական ուղղվածություն է հաղորդում վեպի հետագա ընթացքին,,: Ընդ որում, այդ ամենը ինքնանպատակ չէ: Ինչպես նշում է ատենախոսը, „Գևորգ Դերիկյանը վեպը գրելուց առաջ հետազոտական մեծ աշխատանք է կատարել, ուսումնասիրել ժամանակի հայկական ուղեգրական և վաճառականական երթուղիները և վեպի գործողությունները ներկայացրել 17-րդ դարի Արևելյան Եվրոպայի հայկական ուղիների շրջանակում,,

/Մոլդովա, Ռումինիա և այլն/ /Էջ 77/: Ատենախոսը կարևորում է նաև այն, որ Գ. Դերիկյանն իր երկերում „անդրադառնում է ոչ միայն միջնադարյան թեմատիկային, այլև փորձում է ներկայացնել ժամանակի մտածողությունը„ /Էջ 45/: Ըստ այդմ, քանի որ „դաստիարակչական և ուսուցողական նպատակով խրատական գործերը բնորոշ էին միջնադարյան մտածողությանը„ , Գ. Դերիկյանը ևս նման հնարանքի դիմում է „մեր երկրի անցյալի երբեմնի փառքը և հոգևոր ժառանգությունը պատկերելու համար„: Իսկ, ահա, „գեղարվեստական նման կառուցվածքի և շարադրանքի ընտրությունը ստուգաբանվում է դիդակտիկ գրականության շրջանակում /ընդունվել մերն է – Պ. Դ./: Օրինակ, Տրդատի „ուսումնասության ժամանակ ճարտարապետության արվեստն ասես սովորում է նաև ընթերցողը„ /Էջ 45/: Կամ՝ „Ուսուցողական-խրատական բնույթ ունեն„ նաև Տրդատի ուսուցիչների մտքերը, Տրդատի խորհուրդներն իր աշակերտին՝ Անդրեսադին /Էջ 50/: Եվ ապա՝ հատկանշական է համարվում „պատմության երկաստիճան դիտարկումը, որը ևս կատարվում է ուսուցողական նպատակով„: Այսինքն՝ „Պատմության մեջ պատմության դիտարկումը /օրինակ, Մ. Խորենացու „Ողբի„ - Պ. Դ./ բարձրացնում է վեպի արդիական հնչեղությունը„ /Էջ 49/: Եվ ընդհարրապես, ինչպես նշում է ատենախոսը, „... վեպում շարունակ կենդանիորեն ներկա է Մովսես Խորենացին, որը գծեց մեր պատմության հետագա ընթացքի խորհուրդը„ /Էջ 33/:

Վերջապես, հիմնավոր քննության առնելով Գ. Դերիկյանի „Սրբացած հուշարձան„ երկը և մեջբերելով այդ գործի գրության մեթոդի ու ժանրի վերաբերյալ արտահայտված տարբեր կարծիքները /„Էսսեների ժողովածու, վիպագրություն-ժամանակագրություն„ , „պատմագեղարվեստական ժամանակագրություն„/, ատենախոսը եզրակացնում է, թե „Մեր կարծիքով սույն աշխատությունը պատմագեղարվեստական ժամանակագրություն է, քանզի Գ. Դերիկյանը ոչ միայն պատմությունն է շարադրում՝ օգտվելով այս կամ այն աղբյուրներից, այլև պատմական ժամանակագրությունը ընդհատում է գեղարվեստական հատվածներով՝ մեջբերելով հայ հին և միջնադարյան ինքնատիպ նմուշներ„: Ավելին՝ ընդգծելով, որ „Ահա այստեղ է Գ. Դերիկյանի գրական մեթոդի գեղեցկությունն ու նորարարությունը՝ համադրական գրականություն, պատմագիտություն, վավերականություն, արխիվային փաստաթղթեր և հեղինակային գրական շարադրանք„ /Էջ 94/:

Գևորգ Դերիկյանի գեղարվեստական մտածողության յուրահատկություններից ատենախոսության մեջ դիտարկվում են նաև «բնության պատմականացումը», «բնության երևույթների /օր.՝ «Տրդատ ճարտարապետ»,-ում Արագած լեռան/ խորհրդանշական դերը, «միջնադարում ձևավորված թե՛ եկեղեցական և թե՛ ծիսական արարողությունների», նկարագրությունները, «մարդու և բնության արարչական դաշնությունը», /բնություն և ճարտարապետություն/, ապա նաև ազգագրական ավանդույթների, սովորությունների, միջնադարյան բանահյուսական, լեզվական՝ գրաբարյան և միջին հայերենյան բառաշերտերի մեջբերումները՝ «Ժամանակի կենդանի շունչը», վերարտադրելու նպատակով: Նշվում է, որ, մասնավորապես, սիրային տեսարաններում, գրողը դիմում է հայրենների օգնությանը՝ յուրովի միաձուլելով միջնադարյան չափածոն և արձակը, ինչը ևս, ատենախոսի համոզմամբ, «դերիկյանական արձակի նորարարություններից», է /էջ 42/:

Գ. Դերիկյանի երկերի հիմնավոր քննության մեջ ատենախոսը շեշտում է նաև գրողի կերպարաստեղծման ունակությունը: Ըստ նրա, օրինակ, «Տրդատ ճարտարապետ», պատմավեպի գլխավոր հերոսի կերպարում համոզիչ է պատկերվում այն իրողությունը, որ հետադեմ եկեղեցականներից ու տգետ չարակամներից հալածված Տրդատը, թեև ստիպված է հեռանալ Անիից, բայց երբեք «չի չարանում», մարդկանց դեմ /էջ 37/: Նույնքան բնական են կերտված նաև նրան հակադիր հերոսների՝ Մակար վարդապետի և վանահոր կերպարները, «որոնք փորձում են Տրդատի հոգուց արմատախիլ անել վեհն ու մարդկայինը...», /էջ 41/: Աստիճանական զարգացման /անփորձ արքա – պանդուխտ հայրորդի – վրիժառու թագավոր/ ընթացքի մեջ է ներկայացվում «Գոյամարտ», պատմավեպի գլխավոր հերոսի՝ Գագիկ II-ի կերպարը, իսկ «Վիրավոր կռունկ», -ի գլխավոր հերոսի անցած ճանապարհը բնորոշվում է «Պղնձագործ Արթինից մինչև տպագրիչ ու գիրք ընդօրինակող, զինագործից մինչև ազգային-ազատագրական գործիչ», ուղեգծով /էջ 85/:

Ինչ վերաբերում է Գ. Դերիկյանի ստեղծագործությունների հիմնական գաղափարական հենքին կամ միջուկին, ապա դա, ըստ ատենախոսի իրավացի դիտարկման, ուժեղ, անկախ պետականության ստեղծման և հայ ժողովրդի միասնականության գաղափարներն են, որոնք արտահայտվում են նաև խորհրդանիշ պատկեր – իրողությունների միջոցով: «Տրդատ ճարտարապետ»,-ի հերոսը, ի վերջո, վերադառնում է Անի և կառուցում Ս. Աստվածածնին նվիրված Մայր տաճարը: «Անի քաղաքի կառուցման միջոցով հեղինակը շեշտադրում է հզոր պետականություն ունենալու

գաղափարը,- եզրահանգում է ատենախոսը,- պարիսպների կառուցումը խորհրդանշում է թշնամուց մշտապես պաշտպանված լինելը, իսկ Մայր տաճարի կառուցումը՝ իր չորս հզոր սյուներով՝ հայ ժողովրդի միասնությունը,, /Էջ 40/: „Գոյամարտ,,-ում նշվում է, որ „Ճիշտ է, գահագուրկ է Գագիկ արքան, կործանվել է Բագրատունիների հարստությունը, սակայն Գ. Դերիկյանը պատմավեպն ավարտում է Կիլիկիայի հայոց պետության հիմնմամբ՝ հավատալով հայոց անկախ պետականության ստեղծման մոտավորապես լինելուն,, /Էջ 60/:

Եվ ապա՝ արդեն ավելի արդիական հնչողությամբ. „Ի մի բերելով և ամփոփելով ասվածը, կարող ենք արձանագրել՝ Գևորգ Դերիկյանի „Տրդատ ճարտարապետ,, և „Գոյամարտ,, պատմավեպերն ունեն արդիական հնչողություն և անմիջական արձագանքն էին 1980-90-ական թվականներին հայ ժողովրդի առջև ծառայած խնդիրների: Արցախյան շարժման նախօրեին գրված „Գոյամարտը,, պետք է ոգեշնչեր հայ ժողովրդին և առաջ մղեր՝ ի կատար ածելու մի գոյամարտ ևս,, /Էջ 66/:

Այդուհանդերձ, ավելորդ չենք համարում ներկայացնել մի քանի դիտարկումներ, որոնք, մեր կարծիքով, կարող են օգտակար լինել ատենախոսին աշխատանքի հետագա մշակումների ընթացքում: Այսպես՝

ա/ դրվատելի է, որ Գևորգ Դերիկյանի ստեղծագործությունների քննությունը ատենախոսը կատարում է դասական և ժամանակակից գրողների /Բաֆֆուց մինչև Վարդան Գրիգորյան/ պատմական թեմատիկայով գրված երկերի հետ առնչությունների համատեքստում, ընդ որում՝ նկատելով և վերլուծելով ոչ միայն նմանությունները, այլև տարբերությունները /օրինակ՝ Դ. Դեմիրճյանի, և Վ. Խեչումյանի դեպքում/ : Կարծում ենք, սակայն, որ այդ ցանկում կարելի էր ընդգրկել նաև դասական Օերենցի և ժամանակակից Միքայել Շաթիրյանի՝ հատկապես Կիլիկիայի հայոց պետությանը նվիրված պատմավեպերը: Մանավանդ որ վերջինի 1980-ականի կեսերին լույս տեսած „Արծաթե դար,, երկհատոր պատմավեպը գեղարվեստական մտածողության և ոճական հարցերում որոշակի աղերսներ ունի Գ. Դերիկյանի ստեղծագործությունների հետ,

բ/ ատենախոսը նշում է, որ Գ. Դերիկյանի „Անիին նվիրված եռագրության,, երրորդ մասը՝ „Խորհուրդը մաքառմանը,, դեռևս անտիպ է,, /Էջ 7/, սակայն դա չի ներառված նախորդ՝ 6-րդ էջի տողատակում գրողի անավարտ և անտիպ գործերի թվարկման մեջ: Նույնը վերաբերում է նաև „Հայոց մեծերը,, -ի 2-րդ հատորին,

զ/ Հովհաննես Մելքոնյանի „Իմ Մելքոն պապը, և „Քարավան, գործերը նշվում են որպես վեպեր, մինչդեռ իրականում վիպակներ են /էջ 4/,

դ/ Գ. Դերիկյանի ստեղծագործությունները գնահատողների, ինչպես նշվում է՝ „գրականագետների և արվեստագետների, թվում հիշատակվում են նաև գրող-լրագրողներ Ս. Մուրադյանը, Գր. Ջանիկյանը, Վ. Սանթրյանը...

ե/Երբեմն ստենախոսության նախորդ էջերում արդեն իսկ հիշատակված երկերը, ինչպես նաև որոշ բնորոշումներ թվարկվում են անհարկի /օր.՝ էջ 13/,

զ/ կան լեզվական վրիպումներ և անհարթություններ: Օրինակ՝ „Գ. Դերիկյանը շարունակում է գրել ակնարկներ՝ /.../ որոնց միախառնվում են պատմականությունը և գեղարվեստականը, /էջ 6/, „Մաքառումը, պատմական և երգիծական թեմաներով /?/ պատմվածքների ժողովածու է, /էջ 7/, „Մաքառում, պիեսը, „որը հեռուստատեսային բեմականացման ենթարկվեց /?/..., /էջ 13/, „Պատմավեպում հասկանալի չէ հասկապես /?/..., /էջ 49/, „Վիզեն Խեչումյանի „Գիրք լինելությունը /?/..., /էջ 54/ և այլն:

Ամփոփելով ասվածը, նշենք, որ ամբողջության մեջ ներկայացված ստենախոսությունը՝ լինելով տևական և հիմնավոր ուսումնասիրությունների արդյունք, 20-րդ դարի երկրորդ կեսի գրող-հրապարակախոս Գևորգ Դերիկյանի ստեղծագործությունների ամբողջական ընդգրկման և վերլուծության առաջին փորձը, լիովին բավարարում է գիտական աշխատությանը ներկայացվող պահանջները, գրված է գիտական բարեխղճությամբ ու մակարդակով, հրապարակի վրա եղած գիտական աղբյուրների հաշվառմամբ ու վերլուծությամբ, հետևապես միանգամայն հնարավորություն է տալիս հեղինակին հայցելու բանասիրական գիտությունների թեկնածուի գիտական աստիճան:

05. 07. 2022թ.



Պետրոս Հ. Դեմիրճյան

Բան. գիտ. դոկտոր